

# **BAB PERTAMA**

## **BAB PERTAMA**

### **PENDAHULUAN**

#### **PENGENALAN**

Islam adalah agama penyempurna kepada seluruh agama langit. Allah S.W.T menyatakan bahawa Dia telah menyempurnakan Islam dan meredainya sebagai agama atau cara hidup untuk seluruh umat manusia<sup>1</sup>. Malah dalam ayat yang lain Allah S.W.T menegaskan bahawa hanya Islam sahaja yang diterima sebagai agama dan cara hidup yang betul dan selamat untuk kehidupan di dunia dan akhirat<sup>2</sup>. Seterusnya Allah S.W.T menyatakan bahawa segala ciptaanNya adalah berdasarkan kebenaran dan jauh daripada unsur yang sia-sia<sup>3</sup>. Bertolak daripada hakikat ini, kita dapatkan Islam telah menyediakan berbagai-bagai sistem yang dapat mengendalikan seluruh aspek kehidupan manusia, bagi menjamin kesejahteraan di dunia dan akhirat. Perkahwinan yang menjadi tajuk kajian ini merupakan suatu peraturan yang telah disediakan bagi memenuhi tuntutan jasmani dan rohani manusia. Secara khususnya bagi mengatur urusan kekeluargaan dan kemasyarakatan.

Keunggulan sistem perkahwinan dalam Islam terserlah apabila ia telah berjaya melahirkan individu dan masyarakat yang berkualiti, memiliki ciri-ciri keunggulan dari segi akhlak, nilai, pemikiran dan sebagainya. Hal ini tidak dapat dinafikan kerana ia telah menjadi kenyataan sejarah dan diakui para ulama' seluruhnya.

Mengikut teori *Maqasid asy-Syariah*, objektif asal perkahwinan Islam ialah menjaga keturunan dan menjamin berkekalan zuriat manusia yang beriman di muka bumi ini. Di samping itu terdapat beberapa matlamat lain iaitu matlamat sampingan sebagai penyempurna kepada matlamat asal tadi. Dengan itu dapat melahirkan individu, keluarga dan masyarakat yang mampu menyempurnakan amanah sebagai khilafah Allah di muka bumi ini. Untuk tujuan tersebut maka peraturan-peraturan, syarat-syarat dan hukum-hukum tertentu diwujudkan di dalam perkahwinan Islam.

Di samping perkara-perkara tersebut yang menjadi strategi Syara` bagi mengukuhkan sistem perkahwinan, Islam juga telah mengemukakan kaedah kawalan dalam bentuk pengharaman terhadap perkara-perkara tertentu sebagai langkah pendinding yang akan mengukuh dan menjayakan sistem perkahwinan dalam Islam, kerana institusi kekeluargaan merupakan institusi yang akan melahir dan seterusnya mencorakkan secara lansung individu bagi membentuk sebuah masyarakat cemerlang. Sekiranya hal ini difahami dan dihayati sepenuhnya oleh masyarakat Islam, ia akan memberikan suatu natijah yang sungguh berkesan dalam membentuk sebuah masyarakat yang bertamadun dalam ertikata yang sebenar.

Apa yang berlaku hari ini agak bercanggah dengan fungsi sebenar institusi keluarga, seolah-olah ianya gagal memainkan peranannya. Persoalan yang perlu dijawab ialah kenapa perkara tersebut berlaku di dalam masyarakat hari ini, yang menampakkan kepada kita seolah-olah matlamat perkahwinan Islam tidak

tercapai. Contohnya kehidupan tidak aman bahagia, keruntuhan akhlak semakin menjadi-jadi dan sebagainya. Apakah hubungannya di antara persoalan di atas dengan perkahwinan Islam. Bertolak daripada kepentingan itulah kajian ini dijalankan dengan mengambil masyarakat Kuala Lumpur sebagai sampel. Kajian ini menekankan aspek teori dan realiti yang wujud pada hari ini.

#### **a- OBJEKTIF DAN KEPENTINGAN KAJIAN**

Objektif utama kajian ini ialah untuk membuat penganalisaan terhadap kefahaman dan penghayatan masyarakat Islam di Kuala Lumpur terhadap objektif perkahwinan Islam. Tujuannya ialah untuk mengetahui sejauhmana pengaruh kefahaman dan penghayatan masyarakat Islam terhadap objektif perkahwinan kepada kejayaan sesebuah keluarga dan masyarakat. Hal ini adalah penting kerana keluarga merupakan pusat pembangunan insan yang merupakan aset terpenting ke arah pembinaan keluarga dan masyarakat yang bertamaddun.

Di samping itu kajian ini juga bertujuan untuk meneliti dan mendalami objektif perkahwinan secara terperinci menurut al-Quran dan as-Sunnah serta pandangan ulama'. Ini penting bagi membina landasan teori yang jelas bagi kajian ini.

Kajian ini juga bertujuan untuk mengenalpasti punca sebenar berlaku berbagai permasalahan rumahtangga dan keruntuhan akhlak di dalam masyarakat hari ini. Adakah ia semata-mata kerana ketidakfahaman masyarakat terhadap

objektif perkahwinan dan krisis penghayatannya atau terdapat faktor lain yang lebih mempengaruhi masyarakat ke arah keruntuhan tersebut.

Selain daripada itu, kajian ini merupakan satu langkah ke hadapan dalam usaha mempertingkatkan diri ke peringkat pengajian yang lebih tinggi.

Kajian ini juga penting bagi menyediakan satu model untuk membantu pihak yang terbabit sama ada kerajaan atau swasta mengenalpasti langkah-langkah yang perlu diambil bagi memperbaiki perkara-perkara yang menjadi punca kepada berlakunya berbagai permasalahan rumah tangga dan juga keruntuhan akhlak di dalam masyarakat hari ini. Dengan itu usaha memperbaik pulih semula sistem kekeluargaan yang menjadi tunggak kepada pembangunan dan kemajuan yang sebenar sesebuah negara akan menemui kejayaan.

## **b- SKOP KAJIAN**

Kajian ini hanya akan membuat penganalisaan terhadap kefahaman dan penghayatan masyarakat Islam di Kuala Lumpur terhadap objektif perkahwinan Islam untuk dihubungkan dengan permasalahan kajian. Kuala Lumpur dipilih kerana ia merupakan ibukota negara yang menjadi tumpuan berbagai kategori masyarakat dan sedang mengalami kemajuan dan kemodenan yang begitu pesat pada masa kini. Dalam masa yang sama wujud berbagai permasalahan rumahtangga dan keruntuhan akhlak yang dijangkakan berpunca daripada ketidakfahaman dan tiada penghayatan terhadap objektif perkahwinan Islam.

## **c- METODOLOGI KAJIAN**

Secara umumnya kajian ini adalah dalam bentuk kajian perpustakaan dan kajian lapangan. Kajian perpustakaan ialah kajian yang dilakukan terhadap penulisan-penulisan terdahulu sama ada yang berkaitan secara lansung dengan tajuk ini atau tidak. Data-data diperolehi daripada bahan -bahan yang berbentuk dokumen sama ada buku, jurnal, risalah, majalah, akhbar dan lain-lain sama ada dalam bahasa Melayu, Inggeris dan Arab. Untuk tujuan ini penulis telah menggunakan kemudahan yang disediakan di Perpustakaan Universiti Malaya, Perpustakaan Undang-undang Universiti Malaya, Perpustakaan Tun Sri Lanang, Universiti Kebangsaan Malaysia, Perpustakaan DBKL, Perpustakaan LPPKN, Perpustakaan Akademi Pengajian Islam Nilam Puri dan lain-lain.

Kajian lapangan pula ialah kajian secara lansung terhadap objek yang dipilih untuk diteliti dan dikaji. Sehubungan dengan ini penulis telah membuat kajian khusus terhadap masyarakat Islam di Kuala Lumpur untuk mendapat data-data yang berkaitan.

Antara metode yang digunakan dalam kajian ini ialah;

1) Metode penentuan subjek

Penulis telah menggunakan metode sampling dalam menentukan subjek penelitian. Dalam hal ini penulis memilih masyarakat Islam Kuala Lumpur sebagai subjek bagi mewakili masyarakat Islam yang lain.

2) Metode pengumpulan data

Dalam usaha mengumpul data-data yang berkaitan dengan kajian ini, penulis telah menggunakan beberapa metode, antaranya;

a) Metode historis

Metode ini digunakan untuk mendapat data-data mengenai latarbelakang Kuala Lumpur dalam berbagai aspek.

b) Metode dokumentasi

Metode ini merupakan salah satu cara pengumpulan data dengan melakukan penelitian terhadap dokumen-dokumen yang berkaitan dengan masalah yang dikaji sama ada secara lansung atau tidak lansung. Dokumen-dokumen yang berkaitan dengan perkahwinan, perceraian, kegiatan salahlaku dan

sebagainya diperolehi daripada JAWI, Ibu Pejabat Polis Bukit Aman, LPPKN, DBKL,JKM akhbar dan sebagainya.

c) Metode soalselidik

Metode soalselidik digunakan untuk mendapat maklumat-maklukat yang berkaitan dengan orangramai. Soalselidik ini telah dijalankan terhadap penduduk Islam di sekitar Kuala Lumpur untuk mengetahui sejauhmana kefahaman dan penghayatan masyarakat Islam di kawasan tersebut terhadap objektif perkahwinan Islam.

d) Metode interview

Dalam kajian ini penulis menggunakan metode interview untuk mendapatkan maklumat tambahan bagi kajian ini. Untuk itu penulis telah menemuduga responden bagi mendapat maklumat berkaitan dengan perkahwinan dan urusan rumahtangga.

e) Metode observasi

Metode ini digunakan untuk menguatkan lagi data-data kajian ini yang diperolehi melalui metode di atas bagi menyokong data-data tersebut. Ia dilakukan dengan meninjau dan meneliti keadaan masyarakat dan persekitarannya.

Untuk tujuan penganalisaan data dan ulasan, penulis telah menggunakan metode induktif, deduktif dan kompratif. Yang dimaksudkan dengan metode

induktif ialah penulis mengemukakan kesimpulan yang bersifat umum. Metode deduktif pula mempunyai makna yang berlawanan dengan metode induktif. Sehubungan dengan itu, penulis mengemukakan suatu pernyataan dan seterusnya memberikan bukti-bukti yang menjadi hujjah bagi menyokong kenyataan itu. Sementara metode komperatif pula ialah membuat kesimpulan dengan melakukan perbandingan terhadap data-data yang diperolehi ketika kajian dibuat. Kesemua metode ini digunakan dalam menganalisa dan mengulas dapatan yang diperolehi . Ianya melibatkan bab keempat dan kelima.

#### d- KAJIAN-KAJIAN LEPAS

Setakat ini tidak terdapat apa-apa kajian secara khusus yang menepati tajuk sebenar kajian ini. Apa yang ada hanyalah kajian-kajian yang mempunyai perkaitan dengannya sama ada dari segi konsep perkahwinan, tanggungjawab anggota keluarga, pendidikan anak-anak dan beberapa perkara yang berkaitan dengan perceraian.

Perbincangan mengenai objektif perkahwinan banyak dikemukakan oleh ulama' sama ada ulama' silam atau terkini melalui kitab-kitabnya yang terdapat di perpustakaan-perpustakaan. Di antara buku berbahasa Arab yang ditulis oleh ulama' silam yang menyentuh perkara di atas ialah kitab *al-Muhadhdhab* karangan asy-Syirazi, kitab *Fath al-Qadir* karangan Ibn al-Humām, kitab *al-*

**Mabsūt** karangan as-Sarakhsī, kitab **Rawdah at-Talibīn** karangan an-Nawawīy, kitab **al-Mughnī** karangan Ibn Qudāmāh, **Iḥyā’ Ulūm ad-Dīn** karangan al-Imām al-Ghazālīy, kitab **HujjatulLah al-Bālighah** karangan ad-Dahlawī dan lain-lain lagi. Manakala buku-buku berbahasa Arab yang ditulis oleh ulama terkini yang membincangkan matlamat perkahwinan ini ialah kitab **asy-Syārīah al-Islāmiyyah Fī al-Ahwāl asy-Syakhsiyah** karangan ‘Abd ar-Rahmān Tāj, **Fiqh al-Islām wa Adillatuh** karangan Dr. Wahbah az-Zuhaylāy, kitab **Min Qadāya al-Usrah Fī at-Tasyrī** al-Islāmi karangan Dr. Muhammād ad-Dusūqī, kitab **Dustūr al-Usrah Fī Zilāl-al-Qurān** karangan Ahmad Faiz, kitab **al-Usrah al-Muthlā Fī Dau’ al-Qurān wa as-Sunnah** karangan Dr. ‘Imārah Najib, kitab **Nizām al-Usrah Fī al-Islām** karangan Dr. Muhammād ‘Uqlah dan lain-lain lagi. Penulis-penulis tempatan juga tidak ketinggalan dalam menerbitkan buku-buku agama yang bertemakan kekeluargaan dan membincangkan matlamat perkahwinan ini. Di antaranya ialah buku **Perkahwinan Menurut Islam** dan **Institut Kekeluargaan Islam** karangan Mustafa Hj Daud, buku **Wanita dan Kekeluargaan** karangan Abu ‘Urwah dan lain-lain lagi.

Perbincangan secara khusus mengenai matlamat perkahwinan ini telah dibuat oleh ulama’-ulama’ ilmu Maqasid berdasarkan teori *maqasid*. Di antara kitab-kitab tersebut ialah **al-Muwāfaqāt** karangan asy-Syātibiy, kitab **Dawābit al-Maslahah Fī asy-Syārīah al-Islāmiyyah** karangan Dr. Muhammād Rāmādān al-Būtī, kitab **Maqāsid asy-Syārīah al-Islāmiyyah** karangan Muhammād at-Tāhir ibn ‘Asyūr, kitab **Maqāsid asy-Syārīah Wa Makārimuha** karangan ‘Allāl al-Fāsī,

kitab *al-Islām Maqaṣiduhū Wa Khaṣāṣuhū* karangan Dr.Muhammad 'Uqlah, kitab *Khaṣāṣ at-Tasyrī al-Islāmī Fī as-Siāsah Wa al-Hukm* dan lain lain lagi.

Di samping itu terdapat juga beberapa penulisan ilmiah di Fakulti Syariah, Universiti Malaya, di peringkat ijazah pertama yang membincangkan persoalan-persoalan yang mempunyai perkaitan dengan kajian ini. Di antaranya ialah *Keruntuhan Institusi Kekeluargaan dan Kesannya dalam Pembentukan Masyarakat Islam, Satu Kajian di Wilayah Persekutuan Kuala Lumpur*, kajian oleh Juliah Muhamad Ali, *Remaja Masa Kini-Masalah Sosial dan penyelesaiannya dari Perspektif Islam, Tinjauan khusus di Wilayah Persekutuan Kuala Lumpur*, kajian oleh Norizah Juberi, *Keberkesanan Kaunselor Rumahtangga dalam Menangani Masalah Institusi kekeluargaan Islam, Satu Penilaian di Wilayah Persekutuan Kuala Lumpur*, kajian oleh Salina Ibrahim, *Pendidikan Anak-anak: Satu Kajian dari Sudut Keberkesanan di Kalangan Para Pendidik Wanita di Wilayah Persekutuan*, kajian oleh Siti Mashitoh Mahamood, *Keperihatinan Anak-anak Masa Kini Terhadap Ibubapa*, kajian oleh Yusnita Muhamad Yusuf dan lain-lain. Meskipun penulisan di atas tidak benar-benar menepati topik disertasi ini, ia telah banyak memberi maklumat dalam melengkapkan kajian ini.

Penulisan-penulisan mengenai masalah kekeluargaan dan keruntuhan moral serta akhlak banyak terdapat di dalam majalah-majalah bacaan umum. Ini adalah kerana permasalahan tersebut merupakan masalah semasa yang melanda masyarakat Islam hari dan pendekatan yang dibawa lebih berbentuk semasa. Di

antara majalah yang sering membincangkan permasalahan tersebut ialah Tamaddun, al-Islam, Massa, Muslimah, Ummi, Ibu dan lain-lain lagi.

Berasaskan kesedaran terhadap bertambahnya masalah kekeluargaan dan keruntuhan akhlak ini, ia sering menjadi tajuk utama di dalam seminar-seminar yang bertemakan kekeluargaan sama ada anjuran badan-badan swasta atau kerajaan dalam berbagai-bagai peringkat pada masa kini.

---

### Nota hujung

- <sup>1</sup>. Lihat surah al-Maidah ayat 3 dan surah al-Anbiya' ayat 107.
- <sup>2</sup>. Lihat surah Ali 'Imran ayat 19.
- <sup>3</sup>. Lihat surah Sad ayat 27 dan surah ad-Dukhan ayat 38-39.